



Sujet: Mälchmaschine Krangge-Kasse

**De Winter isch do und unser Marco Odermatt,
fährt im Ski-Weltcup wieder schnäll durab,
in die anderi Richtig goht's bi de „krangge Kasse“,
d Prämie ändere vo Joor zu Joor, wie d Karte bim Jasse,
die „krangge Kasse“ sölle dä Odermatt als Bispiel nä,
und d Prämie doch ändlig „obe-abe“ gä.**

**Alles wird türer mir wänn das nit,
e so gohts nid witter, do mache mir nüm mit,
Mieti, Moscht für's Auto und Krangge-Kasse schlön uf,
e jede Oberwiler-Schnägg wird do sichtlich muff,
3ne gohts aber immer guet und das isch käi Witz,
mim Huus-Arzt, em Schläpfer und mim Versicherigs-Fritz.**

**Dr Lohn goht uff, aber d Hypothek und d Mieti au,
was bringt unseri Zuekunft, wär wäis das genau?
Mir wüsse nit, wie das no witter go soll,
mir sind scho froh, schribe mir ändi Joor e schwarzi Null,
au uns goht's do glich, nämlig wie de Mäischte,
mir chönne uns die „kranggi Kasse“ äifach nüm läischte.**

**Mir hän d Prämie-Rächning vo unserer „krangge Kasse“ becho,
und schtön jetzt mit lärem Portemonaie do,
vom Bundesrot, vom EDI und vom BAG bechunsch käi Hilf,
drum schtön mir d'Spezi jetzt total im Schilf,
für unser Wohlbeinde wärs guet und das nit z knabb,
giengte die Prämie ändlig wieder emol durab.**

**Wirsch alt und grau, bekunsch Paradontitis,
macht dir s Mul weh, wenn de bissisch,
gosch zum Zahnarzt und hesch käi Zusatz-Versicherig dinne,
denn hesch müeh mit de Zehn, das macht's nur no schlimmer,
sin d Zehn dusse und muesch e Prothese ha,
denn mäld di doch am beschte scho mol bi de Fürsorg a.**

**Ob Grundversicherig, Tel-Med, Huusarzt-Modäll oder eso,
jedesmol duesch du e anderi Prämie becho,
wie wär's drum all Joor mit National- und Ständerot-Wahle?
Denn nur vor de Wahle würde d Politiker ändlig afo spare,
drum, unser Vorschlag wenn im Herbscht dure sind die Wahle,
kasch die „kranke Prämie“ mit Super- und Cumulus-Pünggt zahle.**

**Hey, das isch doch nit zum fasse,
die Koschte-Explosion vo de „krangge Kasse“,
bisch gsund und hesch nüt, denn säisch: „Gott sei Dangg“,
doch wenn d'Rächnig muesch zahle, wirdsch grad krangg,
hesch s'Huusarzt-Modäll und wirsch a ne Spezialischt verwiese,
wäisch, dä verrächnet ganz anderi Pryse,
drum sage mir euch us guetem Grund,
lueget guet uf euch und blibet blos gsund.**

**Trotz allem müen mir aber sage,
mir düen do scho uf hochem Niveau klage,
wenn me luegt, was in dere Wält so goht,
sehn mir schwarz und nümme rot,
uns goht's aber guet, mir händ käi Krieg und gnuet z'Ässe,
e Wohnig, Fründe, Familie - nid z vergässe,
das isch doch wichtiger und e guete Grund,
zum Fasnacht mache, egal was chunt.**

www.dspezi.ch

d`Spezi Giftschnägge 2024